

Ley mes ta urgi pa pronto nombra Diputadonan

OTRO SIMAN GOBIERNO NOBO DI MEP POR SER SPERA

ORANJESTAD(AAN)—Segun fuentenan bon na altura di un que otro den mundo politico, por ser spera cu inicio di otro siman lo significa nombracion di e Diputadonan cu sea mester reemplaza Diputadonan cu lo no regresa o lo regresa despues cu dia 24 di December tur Diputado di Aruba a tuma nan retiro.

Ley mes ta haci altamente necesario pa pronto nombra e diputadonan. Asina Eilandenregeling ta bisa cu si ta posible, den e promer reunion di Parlamento, despues cu Diputadonan a tuma nan retiro, mester percura pa nan ser reemplaza.

Si tabata costumbre pa no tene reunion importante di Consejo Insular, mientras Diputadonan ta demisionario, esta ya a entrega nan retiro, e urgencia di introduccion di medidanan cu a drenta na vigor ultimamente, a haci cu Parlamento di Aruba a reuni sin cu a apunta di biaha Diputadonan nobo. Sinembargo, por ser spera, cu

e stipulacion di Eilandenregeling ta ser manteni mas tanto posible, loke ta encera cu no por spera un avalancha di reunion di Parlamento promer cu nombramento di Diputadonan nobo.

Informantenan clave a bisa DIARIO cu por spera cu despues di reunionnan cu lo ser sosteni entre MEP y representantenan di Comercio awe y cu Sindicadonan den fin di siman, cu pa Dialuna ya por spera cu MEP lo anuncia cu e Diputadonan lo sali for di su propio seno, esta cu lo no yega na formacion di un colegio di diputadonan forma pa gremionan social y politiconan di MEP, pero cu por spera un reformacion di e colegio di diputadonan, cu lo significa, segun informantenan clave, uno o dos cara nobo y posiblemente regreso di un ex Diputado pa reemplaza algun di e actual Diputadonan cu lo no regresa.

Awe dirigentenan comercial lo reuni cu MEP COMERCIO LO NO PARTICIPA DEN GOBIERNO

ORANJESTAD(AAN)—Gobernacion ta un asunto di politiconan y no di comercio. Ademas tin cierto situacionnan cu ta haci inaceptable pa comercio como instancia, bay forma parti di un Bestuurscollege. Esaki ta e mensaje cu a keda transmiti den diferente conversacion cu DIARIO a sostene cu fuentenan for di seno comercial, cu awe mester sostene un reunion cu MEP encunto e posibilidad pa yega na un colegio di Diputadonan den cual tambe comercio y sindicadonan tin participacion.

Asina un informante a bisa DIARIO cu Comercio a cumpli cu su deber como partner social na momento cu el a trata di asisti den formacion di un Bestuurscollege Nacional, esta den cual tur partido representa den Parlamento di Aruba tin participacion.

Mientras den seno di comercio ta reina e pensamiento cu gobernacion ta un asunto di politiconan, cu ta ser escogi pa haci e trabao y no di gremionan, tin otro aspectonan cu a ser presenta den conversacionnan cu DIARIO a sostene cu mundo comercial.

Asina ta ser muestra cu den un Bestuurscollege

den cual MEP y gremionan ta participa, MEP lo haya cuatro diputado, mientras comercio y sindicato cada uno lo haya un diputado. Esey ta encera cu ta MEP mes ta goberna y cu e dos gremionan no ta mas cu adorno. Mas normal lo a ser considera un situacion den cual MEP tin tres diputado, y e gremionan tambe tres. Esey lo a significa un balanza, cu segun informantenan for di sector comercial aparentemente lo no tabata na agrado di MEP, comoquiera cu Gezaghebber lo a haya un voto decisivo.

E asunto di Consejero General tampoco tabata aceptable den e asunto aki comoquiera cu den comercio, ta biba e pensamiento cu presencia di e Consejero General lo significa cu e diputadonan mes no sabi kico nan mester haci esta no tin capacidad necesario.

Mientras un decision oficial no a ser tuma pa comercio ainda, generalmente mundo comercial no ta encanta cu e idea cu como instancia ta delega un persona pa bira Diputado. Si MEP dicidi di pidi cualquier persona individualmente pa bira Diputado y e persona aki como persona acepta, Comercio lo no opondre. Pero

pa Comercio mes ser representa como partner den Bestuurscollege, ta algo cu aparentemente no ta ser acepta generalmente den mundo di comercio.

Mientras algun informante a papia na forma modera di e asunto, otro nan a expresa basta critica y hasta a tilda MEP di falta di seriedad.

Asina a ser bisa cu for di

inicio tabata conoci cu e desaroyonan aki mester a ser considera como un acto pa deshaci di cierto miembronan di Bestuurscollege.

Algun miembro di comercio a bisa DIARIO cu nan pronostico ta, cu probablemente dos o tres Diputado di e colegio anterior lo no regresa, y cu lo ser presenta caranan

nobo pa reemplaza nan den un intento pa muestra cu tabata tin cambio.

Awe pues comercio ta reuni cu MEP, pero aparentemente no por spera mucho di e reunion aki mientras comercio por lo general no ta mira un participacion activo den gobernacion como un tarea di gremionan.

DIA 31 DI MAART TELE ARUBA LO SER DECENTRALIZA

ORANJESTAD(AAN)—Un comision mixto di Gobiernonan Central y di Aruba, lo ser instala proximalmente pa traha ariba e decentralizacion di Tele-Aruba y Tele Curacao, esta di Antilliaanse Televisie-maatschappij.

Ministro di Trafico y Comunicacion, Ing. Roland Lacle, a bisa DIARIO, cu en verdad ayera e decision pa decentralizacion ariba e fecha mencionada a ser tuma.

E comision mixto mester termina su labornan promer cu dia 31 di Maart, fecha ariba cual e ejecucion mester ser realiza.

Pa Bestuurscollege di Aruba esey ta significa

cu pa tal fecha mester a funda un compania di television di Aruba y

tambe yega na un acuerdo pa loke ta trata e comisionnan di e compania.

EXXON LO DESMANTELA REFINERIA LAGO

ORANJESTAD(AAN)—Informenan clave ricibi pa redaccion di DIARIO ta muestra cu Exxon lo dicidi pa desmantela e refineria Lago y no opta pa laga e refineria na su sitio actual.

Mientras tin rumornan persistente ta bisa cu Lago lo ya ta den proceso di desmantelacion na momento cu e promer unit ya a ser desmantela, otro fuentenan ta bisa cu Lago lo ta dispuesto pa laga e

refineria intacto te na luna di October di otro aña pa asina duna oportunidad pa haya un comprador pa e refineria. E informe aki di otro banda a ser desmenti pues pa esnan cu ta muestra cu Lago lo ser desmantela na momento cu Exxon bay y cu e compania petrolero lo no habri caminda pa comprador.

Oficialmente nada ta ser participa di parti di Exxon.